

**P.U. (A) 258.**

**AKTA KOMUNIKASI DAN MULTIMEDIA 1998**

**PERATURAN-PERATURAN KOMUNIKASI DAN MULTIMEDIA (PEMBERIAN  
PERKHIDMATAN SEJAGAT) (PINDAAN) 2008**

PADA menjalankan kuasa yang diberikan oleh seksyen 16 dan subseksyen 202(2) dan 204(2) Akta Komunikasi dan Multimedia 1998 [*Akta 588*], Menteri membuat peraturan-peraturan yang berikut:

**Nama dan permulaan kuat kuasa**

1. (1) Peraturan-peraturan ini bolehlah dinamakan **Peraturan-Peraturan Komunikasi dan Multimedia (Pemberian Perkhidmatan Sejagat) (Pindaan) 2008**.

(2) Peraturan-Peraturan ini mula berkuat kuasa pada 1 Ogos 2008.

**Pindaan peraturan 2**

2. Peraturan-Peraturan Komunikasi dan Multimedia (Pemberian Perkhidmatan Sejagat) 2002 [*P.U. (A) 419/2002*], yang disebut “Peraturan-Peraturan ibu” dalam Peraturan-Peraturan ini, dipinda dalam peraturan 2—

- (a) dalam takrif “hasil kasar”, dengan menggantikan perkataan “diterima” dengan perkataan “belum diterima”;
- (b) dalam takrif “kadar penembusan nasional” dengan memasukkan selepas perkataan “penembusan” perkataan “RTBA”;
- (c) dalam takrif “kawasan”, dengan memasukkan selepas perkataan “Kanun Tanah Negara 1965 [*Akta 56/1965*]” perkataan “dan termasuk gabungan daerah atau sebahagian dari suatu daerah”;
- (d) dengan memasukkan selepas takrif “hasil kasar” takrif yang berikut:

‘ “kadar penembusan jalur lebar nasional” ertinya peratusan jumlah keseluruhan pelanggan jalur lebar di Malaysia dibahagikan dengan jumlah keseluruhan penduduk yang diunjurkan berdasarkan Banci Penduduk dan Perumahan Malaysia terkini yang dijalankan oleh Jabatan Perangkaan;’;

(e) dengan menggantikan takrif “kawasan yang kurang liputan perkhidmatan” dengan takrif yang berikut:

‘ “kawasan yang kurang liputan perkhidmatan” ertinya—

(a) berhubung dengan perkhidmatan RTBA, mana-mana kawasan yang kadar penembusan untuk pelanggan RTBA di Malaysia ialah dua puluh peratus di bawah kadar penembusan RTBA nasional atau yang perkhidmatan RTBA tidak disediakan secukupnya sebagaimana yang diperuntukkan di bawah peraturan 3A;

(b) berhubung dengan perkhidmatan capaian jalur lebar, mana-mana kawasan yang kadar penembusan untuk pelanggan jalur lebar di Malaysia ialah di bawah kadar penembusan jalur lebar nasional atau yang perkhidmatan capaian jalur lebar tidak disediakan secukupnya sebagaimana yang diperuntukkan di bawah peraturan 3A; atau

(c) berhubung dengan perkhidmatan telefoni bersel awam, mana-mana kawasan dengan kepadatan penduduk seramai lapan puluh orang setiap satu kilometer persegi atau kurang atau jika perkhidmatan telefoni bersel awam tidak disediakan secukupnya sebagaimana yang diperuntukkan di bawah peraturan 3A;’;

(f) dalam takrif “kos PPS bersih”, dengan menggantikan perkataan “peraturan 12” dengan perkataan “peraturan 12 dan 20A”;

(g) dalam takrif “pemberi perkhidmatan sejagat”, dengan menggantikan perkataan “peraturan 9 atau 10” dengan perkataan “peraturan 9, 10 atau 36F”;

(h) dalam takrif “perkhidmatan capaian Internet”, dengan memotong perkataan “bersama dengan sama ada sambungan dail atau sambungan terus”;

- (i) dengan memasukkan selepas takrif “perkhidmatan capaian Internet” takrif yang berikut:
  - “perkhidmatan capaian jalur lebar” ertinya pemberian capaian Internet kepada pengguna akhir pada kelajuan minimum yang dinyatakan dalam perenggan 5(2)(ba) dan perenggan 36c(2(c));’;
- (j) dengan menggantikan takrif “perkhidmatan telefoni asas” dengan takrif yang berikut:
  - “perkhidmatan telefoni asas” ertinya suatu perkhidmatan aplikasi bagi penghantaran suara atau suara dan data komunikasi, dan tidak termasuk Internet;’; dan
- (k) dalam takrif “rancangan perkhidmatan sejagat”, dengan memasukkan selepas perkataan “peraturan 6” perkataan “atau 36c, mengikut mana-mana yang berkenaan”.

### **Pindaan peraturan 3**

#### **3. Peraturan 3 Peraturan-Peraturan ibu dipinda—**

- (a) dalam subperaturan (1), dengan menggantikan perenggan (a) dan (b) dengan perenggan yang berikut:
  - “(a) pemasangan kemudahan rangkaian dan juga pemberian perkhidmatan rangkaian; dan
  - (b) pemberian perkhidmatan aplikasi untuk—
    - (i) menyediakan capaian kolektif kepada perkhidmatan telefoni asas dan perkhidmatan capaian Internet; dan
    - (ii) menyediakan capaian individu kepada perkhidmatan telefoni asas dan perkhidmatan capaian Internet.”; dan
- (b) dengan memasukkan selepas subperaturan (2), subperaturan yang berikut:
  - “(3) Suruhanjaya boleh menggabungkan mana-mana kawasan yang kurang liputan perkhidmatan atau bahagian dalam sesuatu kawasan yang kurang liputan perkhidmatan untuk pemberian kemudahan rangkaian, perkhidmatan rangkaian atau perkhidmatan aplikasi bagi memenuhi objektif pemberian perkhidmatan sejagat.
  - (4) Bagi maksud subperaturan 3(3), kawasan yang kurang liputan perkhidmatan ertinya mana-mana kawasan yang pada pendapat Suruhanjaya tidak disediakan secukupnya kemudahan rangkaian, perkhidmatan rangkaian, perkhidmatan aplikasi, kemudahan rangkaian dan perkhidmatan rangkaian.”.

### **Peraturan baru 3A**

4. Peraturan-Peraturan ibu dipinda dengan memasukkan selepas peraturan 3 peraturan yang berikut:

#### **“Suruhanjaya boleh memutuskan**

3A. Suruhanjaya boleh memutuskan sama ada perkhidmatan RTBA, perkhidmatan capaian jalur lebar atau perkhidmatan telefoni bersel awam disediakan secukupnya di dalam sesuatu kawasan berdasarkan apa-apa kriteria yang diputuskan oleh Suruhanjaya.”.

### **Pindaan peraturan 5**

5. Subperaturan 5(2) Peraturan-Peraturan ibu dipinda—

(a) dengan memasukkan selepas perenggan (b) perenggan yang berikut—

“(ba) jika berkenaan, kelajuan minimum untuk perkhidmatan capaian jalur lebar sebagaimana yang diputuskan oleh Suruhanjaya;”;

(b) dalam perenggan (g), dengan memotong perkataan “dan” di hujung perenggan itu; dan

(c) dengan memasukkan selepas perenggan (g) perenggan yang berikut:

“(ga) butir-butir tentang ciri-ciri kelayakan yang mesti dipenuhi oleh pemegang lesen sebelum boleh mendaftarkan minat untuk menjadi pemberi perkhidmatan sejagat yang dinamakan bagi sasaran perkhidmatan sejagat; dan”.

### **Pindaan peraturan 6**

6. Subperaturan 6(2) Peraturan-Peraturan ibu dipinda—

(a) dalam perenggan (f), dengan menggantikan perkataan “; dan” dengan perkataan “; jika berkenaan; dan”; dan

(b) dengan memasukkan selepas perenggan (f) perenggan yang berikut:

“(fa) perkiraan untuk perkongsian kemudahan rangkaian dan perkhidmatan rangkaian dengan pemegang lesen yang lain, jika ada; dan”.

### **Pindaan peraturan 12**

7. Peraturan 12 Peraturan-Peraturan ibu dipinda dengan memasukkan selepas subperaturan (2) subperaturan baru yang berikut:

“(3) Walau apa pun apa-apa bayaran yang dibuat di bawah subperaturan (1), pemberi perkhidmatan sejagat dinamakan hendaklah mematuhi peraturan 20.”.

## Pindaan peraturan 16

### 8. Peraturan 16 Peraturan-Peraturan ibu dipinda—

#### (a) dalam subperaturan (6)—

- (i) dalam perenggan (a), dengan memotong perkataan “dan” di hujung perenggan itu; dan
- (ii) dengan memasukkan selepas perenggan (a) perenggan yang berikut:

“(aa) pemberi perkhidmatan sejagat dinamakan tidak boleh mengalihkan apa-apa infrastruktur dan peralatan terpasang dalam sasaran perkhidmatan sejagat melainkan jika diberitahu selainnya oleh Suruhanjaya di bawah subperaturan 7A; dan”;

#### (b) dengan memasukkan selepas subperaturan (7) subperaturan yang berikut:

“(7A) Pemberi perkhidmatan sejagat dinamakan yang dibatalkan di bawah subperaturan (1), hendaklah menurut pemberitahuan bertulis yang dikeluarkan oleh Suruhanjaya, mengalihkan infrastruktur dan peralatan yang terpasang dari sasaran perkhidmatan sejagat atau menyerahkan infrastruktur dan peralatan terpasang dalam sasaran perkhidmatan sejagat kepada pemberi perkhidmatan sejagat dinamakan yang lain, mengikut mana-mana yang berkenaan.

(7B) Mana-mana pemberi perkhidmatan sejagat dinamakan yang tidak mematuhi perenggan 6(a) dan 6(aa) dan subperaturan (7A) melakukan suatu kesalahan di bawah Peraturan-Peraturan ini.”; dan

#### (c) dengan menggantikan subperaturan (8) dengan subperaturan yang berikut:

“(8) Pemberi perkhidmatan sejagat dinamakan yang dibatalkan di bawah subperaturan (1) tidak boleh dibayar apa-apa kos dan perbelanjaan yang dilakukan sebagaimana yang dinyatakan dalam rancangan perkhidmatan sejagat yang diluluskan melainkan jika pemberi perkhidmatan sejagat itu telah membayar balik kepada Suruhanjaya—

- (a) wang yang terlebih dibayar di bawah peraturan 21A;
- (b) apa-apa pembayaran yang kena dibayar di bawah perenggan 6(b);
- (c) semua kos yang dilakukan dalam memulihkan perkhidmatan dalam sasaran perkhidmatan sejagat; dan
- (d) apa-apa kos lain yang telah dilakukan oleh Suruhanjaya.”.

## **Pindaan peraturan 19**

9. Peraturan 19 Peraturan-Peraturan ibu dipinda—

(a) dalam subperaturan (2), dengan menggantikan perkataan “bayaran pendahuluan yang dibuat menurut peraturan 12” dengan perkataan “bayaran yang dibuat menurut peraturan 12 dan 20A”;

(b) dengan memasukkan selepas subperaturan (2), subperaturan yang berikut:

“(2A) Jika Suruhanjaya menyatakan dalam pelawaan di bawah subperaturan 5(2) bahawa hanya kemudahan rangkaian dan perkhidmatan rangkaian dikehendaki supaya disediakan, pembayaran akan dikira sebagai kos boleh elak mengikut Jadual Susunan AA ditolak dengan apa-apa bayaran yang telah dibuat di bawah peraturan 12.”; dan

(c) dengan menggantikan subperaturan (6) dengan subperaturan yang berikut:

“(6) Suatu sasaran perkhidmatan sejagat hendaklah dikeluarkan dari senarai sasaran perkhidmatan sejagat apabila—

(a) tiada kos PPS bersih yang boleh dituntut dari sasaran perkhidmatan itu oleh pemberi perkhidmatan sejagat dinamakan untuk tiga tahun berturut-turut; atau

(b) kawasan itu bukan lagi kawasan yang kurang liputan perkhidmatan sebagaimana yang ditakrifkan dalam peraturan 2.”.

## **Pindaan peraturan 20**

10. Peraturan 20 Peraturan-Peraturan ibu dipinda—

(a) dalam subperaturan (1), dengan menggantikan perkataan “Pemberi” dengan perkataan “Walau apa pun apa-apa bayaran dibuat di bawah peraturan 12 atau 20A, pemberi”;

(b) dengan memasukkan selepas subperaturan (3) subperaturan yang berikut:

“(4) Mana-mana pemberi perkhidmatan sejagat yang tidak mematuhi subperaturan (1) melakukan suatu kesalahan di bawah Peraturan-Peraturan ini.”.

## **Peraturan baru 20A**

11. Peraturan-Peraturan ibu dipinda dengan memasukkan selepas peraturan 20 peraturan yang berikut:

### **“Pembayaran bagi kos modal atau perbelanjaan operasi dan penyelenggaraan**

20A. (1) Suruhanjaya boleh membuat pembayaran setiap suku tahun kepada pemberi perkhidmatan sejagat dinamakan bagi kos modal atau

perbelanjaan operasi dan penyelenggaraan bagi pemberian perkhidmatan sejagat, dengan syarat bahawa pemberi perkhidmatan sejagat dinamakan itu telah menyerahkan permohonan bertulis baginya—

- (a) suku pertama tahunan yang berakhir pada 31 Mac pada atau sebelum 30 April tahun kalendar yang sama;
- (b) suku kedua tahunan yang berakhir pada 30 Jun pada atau sebelum 31 Julai tahun kalendar yang sama;
- (c) suku ketiga tahunan yang berakhir 30 September pada atau sebelum 31 Oktober tahun kalendar yang sama; atau
- (d) suku keempat tahunan yang berakhir 31 Disember pada atau sebelum 31 Januari tahun kalendar yang berikutnya.

(2) Walau apa pun apa-apa permohonan atau pembayaran yang telah dibuat di bawah subperaturan (1), pemberi perkhidmatan sejagat dinamakan hendaklah mematuhi peraturan 20.”.

#### **Peraturan baru 21A**

12. Peraturan-Peraturan ibu dipinda dengan memasukkan selepas peraturan 21 peraturan yang berikut:

##### **“Obligasi untuk memulangkan**

21A. (1) Suruhanjaya boleh mengeluarkan notis bertulis kepada mana-mana pemberi perkhidmatan sejagat dinamakan yang telah menerima apa-apa pembayaran di bawah peraturan 12 atau 20A atau kedua-duanya yang melebihi kos dalam melaksanakan rancangan perkhidmatan sejagat yang telah diluluskan di dalam suatu sasaran perkhidmatan sejagat bagi suatu tahun kalendar untuk memulangkan wang yang terlebih dibayar itu pada atau sebelum apa-apa tarikh yang dinyatakan dalam notis itu.

(2) Pemberi perkhidmatan sejagat dinamakan yang tidak mematuhi notis yang dikeluarkan oleh Suruhanjaya di bawah subperaturan (1), melakukan satu kesalahan di bawah Peraturan-Peraturan ini.”.

#### **Pindaan peraturan 24**

13. Subperaturan 24(1) Peraturan-Peraturan ibu dipinda—

- (a) dengan memotong perkataan ‘pendahuluan’; dan
- (b) dengan memasukkan selepas perkataan “peraturan 12” perkataan “dan 20A”.

#### **Pindaan peraturan 25**

14. Peraturan 25 Peraturan-Peraturan ibu dipinda—

- (a) dalam perenggan (a), dengan memotong perkataan “dan” di hujung perenggan itu;

(b) dalam perenggan (b), dengan menggantikan noktah di hujung perenggan itu dengan perkataan “; dan”; dan

(c) dengan memasukkan selepas perenggan (b) perenggan yang berikut:

“(c) apa-apa wang yang terlebih dibayar yang diterima di bawah peraturan 21A.”.

### **Pindaan peraturan 26**

15. Peraturan 26 Peraturan-Peraturan ibu dipinda dalam perenggan (a) dengan menggantikan perkataan “dan 24” dengan perkataan “, 20A, 24 dan 36J”.

### **Pindaan peraturan 29**

16. Peraturan 29 Peraturan-Peraturan ibu dipinda—

(a) dalam subperaturan (1), dengan menggantikan perkataan “30 April” dengan perkataan “30 Jun”;

(b) dalam subperaturan (2)—

(i) dengan memotong perkataan “dan” di hujung perenggan (a);

(ii) dengan menggantikan noktah di hujung perenggan (b) dengan perkataan “dan”; dan

(iii) dengan memasukkan selepas perenggan (b) perenggan yang berikut:

(c) membuat suatu perisytiharan yang memperakukan bahawa sepanjang pengetahuan dan kepercayaan terbaik pemegang lesen itu penyata itu memberikan gambaran yang tepat dan adil mengenai hal ehwal pendapatan, perbelanjaan dan aliran tunai pemegang lesen itu bagi tempoh yang berakhir pada 31 Disember tahun sebelum itu.”; dan

(c) dengan menggantikan subperaturan (3) dengan subperaturan yang berikut:

“(3) Penyata di bawah subperaturan (1) hendaklah disertakan dengan—

(a) suatu perisytiharan oleh juruaudit luar berlesen yang dilantik oleh pemegang lesen yang memperakukan bahawa—

(i) beliau telah diberi capaian yang mencukupi kepada rekod pemegang lesen bagi membolehkan mengaudit penyata itu;

(ii) beliau telah mengaudit penyata itu; dan

(iii) menurut pengetahuan dan kepercayaan terbaiknya, bahawa penyata itu telah dibuat berasaskan kepada standard perakaunan yang terpakai di Malaysia dan memberikan gambaran yang tepat dan adil

mengenai hal ehwal pendapatan, perbelanjaan dan aliran tunai pemegang lesen bagi tempoh yang berakhir pada 31 Disember tahun sebelum itu; dan

(b) apa-apa maklumat lain yang difikirkan sesuai oleh juruaudit luar berlesen yang disebut dalam perenggan (a).”.

## **Bahagian Baru VI**

17. Peraturan-Peraturan ibu dipinda dengan memasukkan selepas Bahagian VI, Bahagian yang berikut:

### **BAHAGIAN VIA**

#### **PENYUMBANG UTAMA**

##### **Penyumbang utama**

36A. Bagi maksud Bahagian ini, penyumbang utama ertinya mana-mana pemegang lesen yang sumbangannya kepada Kumpulan Wang PPS bagi tahun kalendar sebelumnya di bawah peraturan 27 melebihi dua puluh juta ringgit atau apa-apa jumlah lain yang diputuskan oleh Menteri.

##### **Kadar sumbangan yang boleh digunakan untuk pemberian perkhidmatan sejagat**

36B. (1) Mana-mana penyumbang utama adalah dibenarkan untuk menggunakan sehingga lima puluh peratus, atau apa-apa peratusan yang diputuskan oleh Menteri dari sumbangannya dalam sesuatu tahun kalendar bagi maksud menampung kos modal untuk memberikan perkhidmatan sejagat.

(2) Tiada pembayaran bagi perbelanjaan operasi dan penyelenggaraan boleh dibuat bagi pemberian perkhidmatan sejagat di bawah Bahagian ini.

##### **Obligasi penyumbang utama untuk mengemukakan draf rancangan perkhidmatan sejagat**

36C. (1) Mana-mana penyumbang utama yang ingin menggunakan sumbangannya sebagaimana yang diperuntukkan di bawah peraturan 36B hendaklah mengemukakan draf rancangan perkhidmatan sejagat pada atau sebelum 30 September bagi setiap tahun kalendar.

(2) Draf rancangan perkhidmatan sejagat di bawah subperaturan 36C(1) hendaklah dikemukakan secara bertulis berserta maklumat yang berikut:

(a) butiran terperinci lokasi dalam sasaran perkhidmatan sejagat, tempat yang baginya rancangan perkhidmatan sejagat itu terpakai;

- (b) butiran terperinci tentang kemudahan rangkaian, perkhidmatan rangkaian dan perkhidmatan aplikasi yang akan disediakan di dalam sasaran perkhidmatan sejagat;
- (c) di mana yang berkenaan, kelajuan minimum untuk perkhidmatan capaian jalur lebar sebagaimana yang diputuskan oleh Suruhanjaya;
- (d) butiran terperinci teknologi yang akan digunakan berkenaan dengan sasaran perkhidmatan sejagat;
- (e) jadual untuk melaksanakan rancangan perkhidmatan sejagat;
- (f) kos modal bagi pemasangan kemudahan rangkaian atau pemberian perkhidmatan rangkaian atau perkhidmatan aplikasi di dalam sasaran perkhidmatan sejagat;
- (g) perkiraan untuk perkongsian kemudahan rangkaian dan perkhidmatan rangkaian dengan pemegang lesen yang lain, jika ada; dan
- (h) apa-apa maklumat lain yang dikehendaki oleh Suruhanjaya.

(3) Jika mana-mana penyumbang utama gagal untuk mengemukakan draf rancangan perkhidmatan sejagat mengikut subperaturan (1) dan (2), Bahagian ini tidak terpakai bagi sumbangannya di bawah peraturan 36B.

### **Perkara yang perlu diberi pertimbangan bagi meluluskan draf rancangan perkhidmatan sejagat**

36D. (1) Suruhanjaya dalam memutuskan draf rancangan perkhidmatan sejagat di bawah peraturan 36E hendaklah menimbangkan perkara-perkara yang berikut:

- (a) sama ada draf rancangan perkhidmatan sejagat itu meliputi perkara yang diminta di bawah subperaturan 36C(2);
- (b) sama ada draf rancangan perkhidmatan sejagat itu adalah efisien dan boleh dilaksanakan dari segi ekonomi;
- (c) sama ada draf rancangan perkhidmatan sejagat itu boleh dilaksanakan secara progresif di dalam seluruh kawasan sasaran perkhidmatan sejagat dalam tempoh yang di anggap munasabah oleh Suruhanjaya;
- (d) sama ada draf rancangan perkhidmatan sejagat itu akan menyumbang kepada objektif pemberian perkhidmatan sejagat; dan
- (e) apa-apa perkara lain yang difikirkan berkaitan oleh Suruhanjaya.

(2) Suruhanjaya boleh, pada bila-bila masa sebelum meluluskan draf rancangan perkhidmatan sejagat, meminta penyumbang utama untuk memberikan apa-apa maklumat lanjut atau dokumen lain dalam tempoh yang dinyatakan dalam permintaan itu atau apa-apa pelanjutan masa yang diberikan oleh Suruhanjaya.

(3) Suruhanjaya hendaklah mempertimbangkan maklumat lanjut sedemikian atau dokumen lain yang diberikan oleh penyumbang utama sebelum meluluskan draf rancangan perkhidmatan sejagat itu.

### **Kuasa Suruhanjaya ke atas draf rancangan perkhidmatan sejagat**

36E. (1) Suruhanjaya, boleh setelah menimbangkan draf rancangan perkhidmatan sejagat yang dikemukakan oleh mana-mana penyumbang utama—

- (a) meluluskan draf rancangan perkhidmatan sejagat itu tanpa pindaan;
- (b) meluluskan draf rancangan perkhidmatan sejagat itu dengan pindaan; atau
- (c) menolak draf rancangan perkhidmatan sejagat.

(2) Bagi maksud mempertimbangkan draf rancangan perkhidmatan sejagat di bawah perenggan (1)(a) atau (b), Suruhanjaya boleh melalui notis secara bertulis, mengarahkan penyumbang utama untuk memberikan apa-apa bagi maklumat lanjut dan membuat apa-apa perubahan kepada draf rancangan perkhidmatan sejagat.

(3) Draft rancangan perkhidmatan sejagat yang diluluskan di bawah perenggan 1(a) atau 1(b) hendaklah menjadi rancangan perkhidmatan sejagat diluluskan bagi maksud perlaksanaan rancangan perkhidmatan sejagat.

### **Pemberitahuan kelulusan draf rancangan perkhidmatan sejagat dan penamaan penyumbang utama sebagai pemberi perkhidmatan sejagat**

36F. (1) Jika Suruhanjaya meluluskan draf rancangan perkhidmatan sejagat menurut perenggan 36E(1)(a) atau (b), Suruhanjaya hendaklah memberitahu penyumbang utama secara bertulis mengenai keputusannya dan hendaklah menamakan penyumbang utama itu sebagai pemberi perkhidmatan sejagat dinamakan bagi sasaran perkhidmatan sejagat itu.

(2) Pemberitahuan dan penamaan di bawah subperaturan (1) hendaklah termasuk yang berikut:

- (a) tarikh permulaan bagi pelaksanaan rancangan perkhidmatan sejagat yang diluluskan itu;
- (b) rancangan perkhidmatan sejagat yang diluluskan itu termasuklah kos dan perbelanjaan yang akan dibayar daripada Kumpulan Wang PPS;
- (c) jadual bagi pembayaran dan jadual bagi menyiapkan segala kerja;
- (d) tarikh bagi menyiapkan segala kerja bagi pelaksanaan rancangan perkhidmatan sejagat yang diluluskan itu;
- (e) tarikh akhir bagi penyerahan tuntutan bayaran; dan
- (f) apa-apa perkara lain yang difikirkan berkaitan oleh Suruhanjaya.

### **Penggunaan sumbangan penyumbang utama**

36G. Jika mana-mana rancangan perkhidmatan sejagat yang telah diluluskan di bawah peraturan 36E tidak menggunakan sepenuhnya sumbangan sebagaimana yang dinyatakan di bawah subperaturan 36B(1), apa-apa lebihan sumbangan

yang tidak digunakan hendaklah digunakan untuk pelaksanaan rancangan perkhidmatan sejagat yang diluluskan di bawah peraturan 8.

### **Akaun berasingan bagi pelaksanaan rancangan perkhidmatan sejagat**

36H. Suruhanjaya boleh menghendaki penyumbang utama untuk menyelenggarakan akaun yang berasingan bagi pelaksanaan rancangan perkhidmatan sejagat.

### **Tuntutan bagi pembayaran oleh penyumbang utama**

36I. (1) Pemberi perkhidmatan sejagat dinamakan hendaklah mengemukakan tuntutan bertulis kepada Suruhanjaya bagi kos modal pemberian perkhidmatan sejagat dalam suatu sasaran perkhidmatan sejagat bagi pelaksanaan perkhidmatan sejagat.

(2) Tuntutan bagi pembayaran di bawah subperaturan (1) hendaklah menurut peruntukan dalam rancangan perkhidmatan sejagat yang diluluskan dan hendaklah disertakan dengan apa-apa dokumen yang dikehendaki oleh Suruhanjaya.

(3) Jika tiada tuntutan dibuat pada atau sebelum tarikh akhir bagi menyerahkan tuntutan bayaran yang dinyatakan di dalam pemberitahuan di bawah subperaturan 36F(2), tiada pembayaran kena dibayar atau perlu dibayar kepada pemberi perkhidmatan sejagat dinamakan berkenaan pelaksanaan rancangan perkhidmatan sejagat yang diluluskan.

### **Suruhanjaya hendaklah menentusahkan tuntutan bagi pembayaran**

36J. (1) Suruhanjaya hendaklah menentusahkan apa-apa tuntutan yang dibuat oleh pemberi perkhidmatan sejagat dinamakan sebelum bayaran dibuat daripada Kumpulan Wang PPS.

(2) Suruhanjaya boleh, pada bila-bila masa, bagi maksud menentusahkan tuntutan di bawah subperaturan (1), menghendaki pemberi perkhidmatan sejagat dinamakan untuk memberikan apa-apa maklumat atau dokumen lanjut dalam tempoh yang dinyatakan dalam permintaan itu atau apa-apa pelanjutan masa yang diberikan oleh Suruhanjaya.

(3) Suruhanjaya hendaklah memberikan pertimbangan yang sewajarnya kepada apa-apa maklumat atau dokumen lanjut lain yang diberikan oleh pemberi perkhidmatan sejagat dinamakan dalam menentusahkan sesuatu tuntutan itu.

(4) Jika apa-apa maklumat atau dokumen lanjut lain yang diperlukan di bawah subperaturan (2) tidak diberikan oleh pemberi perkhidmatan sejagat dinamakan dalam tempoh yang dinyatakan dalam permintaan itu atau apa-apa pelanjutan masa yang diberikan oleh Suruhanjaya, Suruhanjaya boleh menentusahkan tuntutan itu dan penentusahan yang dibuat oleh Suruhanjaya adalah muktamad.

### **Pembayaran tuntutan kepada penyumbang utama**

36K. (1) Pembayaran bagi kos modal yang dilakukan dalam melaksanakan rancangan perkhidmatan sejagat yang diluluskan dalam sasaran perkhidmatan sejagat mengikut peraturan 36E dalam sasaran perkhidmatan sejagat hendaklah dibuat berasaskan tuntutan yang telah ditentukan sewajarnya di bawah peraturan 36J tidak lewat daripada 30 hari dari tarikh penentusahan diselesaikan oleh Suruhanjaya.

(2) Walau apa pun subperaturan (1), Suruhanjaya boleh mengikut budi bicara mutlaknya membuat pembayaran interim apa-apa amaun tuntutan semasa menunggu penentusahan tuntutan itu.

### **Tuntutan yang berlebih-lebihan**

36L. (1) Jika Suruhanjaya mendapati bahawa pemberi perkhidmatan sejagat dinamakan telah menyatakan tuntutannya berlebih-lebihan berkenaan dengan kos yang dilakukan dalam pelaksanaan rancangan perkhidmatan sejagat yang diluluskan dalam sasaran perkhidmatan sejagat bagi sesuatu tahun kalendar, Suruhanjaya boleh, melalui pemberitahuan bertulis kepada pemberi perkhidmatan sejagat dinamakan itu —

- (a) menyatakan dapatan Suruhanjaya; dan
- (b) meminta pemberi perkhidmatan sejagat dinamakan untuk menjelaskan secara bertulis lebih itu dalam tempoh masa yang dinyatakan.

(2) Jika penjelasan yang diminta di bawah perenggan (1)(b) tidak diberikan oleh pemberi perkhidmatan sejagat dinamakan dalam tempoh yang dinyatakan dalam permintaan itu atau apa-apa pelenjutan masa yang diberikan oleh Suruhanjaya, Suruhanjaya boleh membuat keputusan terhadap tuntutan yang dibuat dan keputusan Suruhanjaya itu adalah muktamad.

(3) Suruhanjaya hendaklah, sebelum membuat keputusan di bawah subperaturan (2) menimbangkan yang berikut:

- (a) penjelasan yang diberikan oleh pemberi perkhidmatan sejagat dinamakan, jika ada;
- (b) sama ada pemberi perkhidmatan sejagat dinamakan bertindak dengan suci hati; dan
- (c) apa-apa perkara lain yang difikirkan berkaitan oleh Suruhanjaya.

(4) Jika Suruhanjaya memutuskan bahawa pemberi perkhidmatan sejagat dinamakan telah menyatakan tuntutannya secara berlebih-lebihan bagi satu tahun kalendar, Suruhanjaya berhak untuk membuat anggaran tuntutan pemberian perkhidmatan sejagat dinamakan bagi tahun kalendar itu dan anggaran Suruhanjaya itu adalah muktamad.

(5) Walau apa pun subperaturan (2) dan (4), pemberi perkhidmatan sejagat dinamakan yang secara sengaja mengemukakan tuntutan yang berlebih-lebihan atau membuat tuntutan bagi kos yang tidak dilakukan dalam melaksanakan rancangan perkhidmatan sejagat yang diluluskan dalam sasaran perkhidmatan sejagat melakukan suatu kesalahan di bawah Peraturan-Peraturan ini.

## Ketidakpakaian

36M. Peraturan 12 dan Bahagian V tidak terpakai bagi Bahagian ini.”.

## Pindaan Jadual

18. Jadual kepada Peraturan-Peraturan ibu dipinda—

(a) dengan menggantikan Susunan A dengan Susunan yang berikut:

“SUSUNAN A

(Peraturan 19)

### PENGIRAAN KOS BERSIH PEMBERIAN PERKHIDMATAN SEJAGAT

<i>Kos boleh elak</i>		<i>Ditolak hasil yang diketepikan</i>		<i>Kos bersih pemberian perkhidmatan sejagat</i>
<i>(1)</i>		<i>(2)</i>		<i>(3)</i>
<i>Butiran</i>	<i>RM</i>	<i>Butiran</i>	<i>RM</i>	<i>RM</i>
1. Kos tambahan tahunan bagi modal susut nilai bagi jangka hayat operasi kelengkapan peralatan berikut yang digunakan untuk memberikan perkhidmatan di dalam sasaran perkhidmatan sejagat: <ul style="list-style-type: none"><li>• Pensuisan</li><li>• Capaian</li><li>• Pengguna akhir</li><li>• Penghubung</li><li>• Infrastruktur awam</li></ul>		1. Hasil tahunan yang diterbitkan daripada sasaran perkhidmatan sejagat: <ul style="list-style-type: none"><li>• Fi penyambungan</li><li>• Sewa bagi talian ibu sawat</li><li>• Kos panggilan (termasuk sambung dail Internet)</li><li>• Kos sambungtara yang diterima daripada pemberi rangkaian dan/ atau perkhidmatan rangkaian lain</li></ul>		

<i>Kos boleh elak</i>		<i>Ditolak hasil yang diketepikan</i>		<i>Kos bersih pemberian perkhidmatan sejagat</i>
<i>(1)</i>		<i>(2)</i>		<i>(3)</i>
<i>Butiran</i>	<i>RM</i>	<i>Butiran</i>	<i>RM</i>	<i>RM</i>
<ul style="list-style-type: none"> <li>• Perbelanjaan modal lain</li> <li>• Perbelanjaan modal kecilan</li> <li>• Perbelanjaan mewujudkan portal Internet dan/atau laman web untuk pusat-pusat yang menyediakan akses kolektif bagi perkhidmatan Internet</li> </ul>		<ul style="list-style-type: none"> <li>• Hasil panggilan yang diterbitkan daripada panggilan yang ditamatkan dalam sasaran perkhidmatan sejagat</li> <li>• Perkhidmatan lain (perkhidmatan tambahan)</li> <li>• Hasil daripada pemberian capaian kolektif</li> </ul>		
<p>2. Ditambah kos operasi dan belanja penyelenggaraan tahunan yang dilakukan bagi memberikan perkhidmatan di dalam sasaran perkhidmatan sejagat:</p> <ul style="list-style-type: none"> <li>• Penyelenggaraan rangkaian dan perkhidmatan</li> <li>• Sewa infrastruktur awam</li> <li>• Pembayaran sambungtara kepada pemberi rangkaian kemudahan dan/atau pemberi perkhidmatan rangkaian lain</li> </ul>		<p>2. Ditambah hasil tahunan yang diterbitkan daripada sumber lain termasuklah:</p> <ul style="list-style-type: none"> <li>• Hasil daripada perkhidmatan kepada pemegang lesen lain dan pengguna (badan Kerajaan, dsb.)</li> <li>• Hasil daripada perkongsian bersama infrastruktur dengan pemegang lesen lain (tiang, tapak, bangunan, dsb.)</li> </ul>		

<i>Kos boleh elak</i>		<i>Ditolak hasil yang diketepikan</i>		<i>Kos bersih pemberian perkhidmatan sejagat</i>
<i>(1)</i>		<i>(2)</i>		<i>(3)</i>
<i>Butiran</i>	<i>RM</i>	<i>Butiran</i>	<i>RM</i>	<i>RM</i>
<ul style="list-style-type: none"> <li>• Pembayaran perkhidmatan kepada pemberi rangkaian kemudahan dan/atau pemberi perkhidmatan rangkaian</li> <li>• Fi spectrum</li> <li>• Perkhidmatan bantuan operator (panggilan operator, panggilan kecemasan, panggilan direktori)</li> <li>• Perkhidmatan pelanggan dan bil</li> <li>• Peruntukan hutang lapuk</li> <li>• Vandalisma dan fraud</li> <li>• Fi bagi audit tuntutan bayaran</li> <li>• Latihan kepenggunaan Teknologi Komunikasi dan Maklumat</li> <li>• Kempen kesedaran, promosi dan pemasaran</li> </ul>				

<i>Kos boleh elak</i>		<i>Ditolak hasil yang diketepikan</i>		<i>Kos bersih pemberian perkhidmatan sejagat</i>
(1)		(2)		(3)
<i>Butiran</i>	<i>RM</i>	<i>Butiran</i>	<i>RM</i>	<i>RM</i>
<ul style="list-style-type: none"> <li>• Penyelenggaraan dan pengurusan portal Internet dan/atau pusat-pusat yang menyediakan akses kolektif bagi perkhidmatan Internet</li> <li>• Perumah bagi portal internet</li> </ul>				

”; dan

(b) dengan memasukkan selepas Susunan A Susunan yang berikut:

“SUSUNAN AA

(Perenggan 19(2)(a))

*PENGIRAAN KOS BERSIH PEMBERIAN PERKHIDMATAN SEJAGAT*

<i>Kos boleh elak</i>	
<i>Butiran</i>	<i>RM</i>
1. Kos modal untuk peralatan dan perkhidmatan yang digunakan untuk memberikan perkhidmatan di sasaran perkhidmatan sejagat: <ul style="list-style-type: none"> <li>• Pensuisan</li> <li>• Capaian</li> <li>• Penghubung</li> <li>• Infrastruktur awam</li> <li>• Perbelanjaan modal lain</li> <li>• Perbelanjaan modal kecilan</li> </ul>	

”.

Dibuat 8 Julai 2008

[KTAK: BP(3)353/1/3; PN(PU<sup>2</sup>)601/VII]

DATO’ SHAZIMAN BIN ABU MANSOR  
Menteri Tenaga, Air dan Komunikasi

Hakcipta Pencetak (H)

PERCETAKAN NASIONAL MALAYSIA BERHAD

Semua Hak Terpelihara. Tiada mana-mana bahagian jua daripada penerbitan ini boleh diterbitkan semula atau disimpan di dalam bentuk yang boleh diperolehi semula atau disiarkan dalam sebarang bentuk dengan apa jua cara elektronik, mekanikal, fotokopi, rakaman dan/atau sebaliknya tanpa mendapat izin daripada Percetakan Nasional Malaysia Berhad (Pencetak kepada Kerajaan Malaysia yang dilantik).

